

Канон, творение кир Феофана, глас 4

Песнь 1, ирмос:

Отверзу уста моя, и наполнятся Духа, и слово отрыгну Царице Матери, и явлюся светло торжествуя, и воспою радуясь Сея зачатие.

Да поет Ти, Владычице, движа свирель духовную, Давыд праотец Твой: послушай Дщи радованна гласа от ангела, радость бо возвещает Ти неизглаголанную.

Вопию Ти, веселяся, приклони ухо Твое, и вонми ми, Божие поведаящу без семене зачатие. обрете бо благодать пред Богом, еяже не обрете другая николиже, Пречистая.

Слава. Да разумею, ангеле, твоих словес силу, како будет, еже рече; глаголи явственно. Како зачну Девою сущи Отроковица; како же и Мати буду Зиждителю;

И ныне. Лестно мя вещати помышляеши, якоже прилучися, и радуюся, зря Твое утверждение. дерзай, Владычице, Богу бо хотящу, удобь скончаются преславная.

Песнь 3, ирмос:

Твоя певцы, Богородице, живий нетления Источниче, лик себе совокупльши духовен утверди, и честным Ти зачатием, венцем славы сподоби.

Оскуде князь от Иуды, время настало есть уже, в неже явится языков Надежда, Христос. ты же, како Сего рожду Девою сущи, скажи ми;

Ищещи от мене уведети Дево, образ зачатия Твоего, но той несказанен есть, Дух же Святыи зиждительною силою осенив Тя совершит.

Слава. Моя прабаба приемши волю змиину, пици Божественныя изгнана бысть. темже и Аз боюся целования ти странна, стыдящися поползновения.

И ныне. Божии предстатель послан есмь, Божественныи совет поведати Ти. Что ся ми боиши, Пренепорочная, паче Тебе боящагося; что ми говееши, Владычице, говеющему ми Тебе честно;

Седален, глас 4.

Подобен: Удивися Иосиф:

Послан бысть Гавриил к Девей Марии, принося Ей неизглаголаную радость, яко зачнеши без семене, и родиши Сына Превечнаго Бога, и спасет люди от грех их. послушествует Пославый мя вопити Тебе радость, Благословенная,

Девою родиши, и по Рождестве Девою паки пребудеши.

Слава, и ныне. Гавриил с Небесе, радуися зовет Чистей, яко зачнеши во чреве Превечнаго Бога, словом концы составляшаго. Она же к нему отвещаваше, мужа не знаючи, како рожду Сына; и сказуя глаголаше Ангел Богородице Деве: Дух Святыи найдет на Тя, и сила Вышняго осенит Тя.

Песнь 4, ирмос:

Сяди во славе на престоле Божественне на облаце легце, прииде Исус Пребожественный, от Пречистыя Девы, спасе же вопиющыя, слава, Христе, силе Твоей.

Святу некую Деву раждающую, слышах пророка древле, Еммануила прорекша. хошу же разумети, како Божества размещение, естество человеческое претерпит;

Явила есть купина, неопальна пребывши, приемши пламень, Обрадованная Препетая, Твоего таинства преславное: по Рождестве бо пребудеши Чистая присно Дева.

Слава. Освещаемь сиянием Бога Вседержителя, истине Проповедниче, глаголи Гаврииле истину: како нетленне бывши чистоте Моей, Слова рожду с плотию Безплотнаго.

И ныне. Со страхом Ти, яко раб Госпоже предстою, с боязнию Дево, ныне смотри стыжуся Тебе. Яко бо дождь на руно снидет на Тя слово Отчее, якоже изволи.

Песнь 5, ирмос:

Удивишася всяческая о Божественном зачатии Твоем. Ты бо Неискусобрачная Дево, прият во утробе надо всеми Суцаго Бога, и родила еси Безлетнаго Сына, всем воспевающим Тя мир подавающегоа.

Разумети не могу Твоих словес испытания. чудеса бо быша множицею, Божественною силою дивна бываемая, скрижали и законнии образы, родила девица без мужа николиже.

Дивит Пренепорочная, и странно бо чудо Твое, Едина бо Ты всех Царя приимши во утробе воплощаема. и Тя прообразуют пророческая речения, гадания и законнии образы.

Слава. Иже всем Невместимыи, и всем Невидимыи, како Сей может во чрево Девиче вселитися, еже Сам созда; како зачну Бога Слова, Собезначальна Отцу и Духови;

И ныне. К Твоему праотцу Давыду, обещася посадити от плода чрева, на

престоле царства его. Ияковлю Тя Доброту, едину избра словесное селение.

Песнь 6, ирмос.

Возопил прообразуя погребение тридневное, пророк Иона в ките Богу моляся. из тли спаси мя, Исусе, Царю Сыи силам.

Глагол твоих, Гаврииле, глас радованен приемши, веселия Божественного исполнихся. радость бо возвещаеши неконечную.

Се Тебе дастся радость, Богомати Божия, и вся тварь вопиет Ти Богоневесто. Ты бо Едина Мати Божия, пронаречеса Чистая.

Слава. Еввы Мною ныне да упразднится осуждение, Мною долг древний, да воздан будет днесь, Мною радость древняя да дастся преисполнена.

И ныне. Обещася Бог Аврааму праотцу, благословити от семене его языки, Чистая, Тобою же прехождение обет приемлет днесь.

Кондак, глас 8.

Взбранной Воеводе победительная, яко избавльшеся от злых, благодарственная восписуем Ти раби Твои, Богородице: но яко имущи державу не победимую, от всяких нас бед свободи, да зовем Ти, радуйся, Невесто Неневестная.

Икос. Ангел предстатель с Небесе послан бысть рещи Богородице: радуися! и со безплотным гласом воплощаема Тя зря, Господи, ужасашеся и стояше, зовый к Ней таковая: радуися, Еяже ради радость возсияет. радуися, Еяже ради клятва исчезнет. радуися, падшаго Адама возстание. радуися, слез Еввиных избавление. радуися, высоту, неудобовосходимая человеческими помыслы. радуися, глубину, неудобь зримая и ангельскими очима. радуися, яко еси Царево Седалище. радуися, яко носиши Носящаго вся. радуися, Звездо, являющая Солнце. радуися, утробо Божественного воплощения. радуися, Еяже ради обновляется тварь. радуися, Еяже ради поклоняемся Творцу. радуися, Невеста Неневестная.

Песнь7, ирмос:

Не послужиша твари Богомудрии, паче Зиждителя. но огненное прещение мужески поправше, радовахуся поюще, препетии иже отцем Господь и Бог благословен еси.

Свет невещественны поведаю, в вещественне телеси совокупаемъ, за милосердие многое, светло Благовещению Божественного проповедания, ныне зываеши Ми, благословен, Пречистая, плод Твоего чрева.

Радуйся, Владычице Дево, радуйся Пречистая, радуйся, Приятелище Божие,

радуися свещниче света, Адамово воззвание, и Еввы избавление, горо святая, и преславное священство, и чертог безсмертия.

Слава. Душу очисти Ми, и тело освяти, Церковь сотвори вмести Богу. сень Богоукрашену, одушевлен храм наитием Пресвятаго Духа, и Жизни Чистую Матерь.

И ныне. Яко многосветлую свещу, и Богоделанен чертог, вижу Тя ныне яко злат ковчег. закону Подателя прими, Дево, благоизволившаго человеческое избавити Тобою тленное существо.

Песнь 8, ирмос:

Слыши Отроковице Дево Чистая, да речет убо Гавриил, совет Вышняго древле истинный. буди к приятию готова Богу, Тобою Невместимый с человеки поживет, тем и радуяся вопию, благословите вся дела Господня Господа, и превозносите Его во веки.

Ум всяк побеждается землен, отвеща Девица, ищущи, яже ми вещаеши, преславная слышах словеса Твоя, но боюся ужасающися, да не лестию мя яко Евву далече послещи от Бога, но обаче вопию, благословите вся дела Господня Господа, и превозносите Его во веки.

Се Тебе недоуменное разрешится. рече к сим Гавриил, добре бо рече вещь непостижна. словесем Твоих устен повинующися прочее, не сумнися яко лести, якоже вещи веруй. аз бо радуяся вопию, благословите вся дела Господня Господа, и превозносите Его во веки.

Закон сей от Бога человеком есть, Непорочная абие рече, общия любве рождество происходит, не знаю ложа сверстника отнюд, како убо глаголеши, яко рожду; боюся, еда лещь глаголеши. но обаче вопию, благословите вся дела Господня Господа, и превозносите Его вовеки.

Слава. Глаголы, яже ми вещаеши, Чистая, ангел паки рече, обычай есть рождества человеком смертным. Суцаго же Ти Бога обещаваю, паче слова и смысла воплощаема, якоже весть из Тебе. темже и радуяся вопию: благословите вся дела Господня Господа, и превозносите Его во веки.

И ныне. Являешимися истине вещатель, рече Девая. радости бо общия пришел еси благовестник. дшу очистих с телом, и по глаголу твоему буди ми, да вселится Бог в мя, Емуже вопию с тобою, благословите вся дела Господня Господа, и превозносите Его во веки.

Песнь 9, ирмос.

Яко о душевнем Божии Киоте, не прикоснется никакоже рука не верных. уста же верных Богородице не молчно, глас Ангела да поют, радостию вопиюще, радуися Обрадованная, Господь с Тобою.

Канон Благовещению

Автор: Павел
10.04.2011 01:15

Паче смысла заченши Бога, естества обычая утаися, Отроковице, Ты бо в Рожестве матерьскаго избежа тленнаго естества. темже достойно слышиши, радуися Обрадованная Господь с Тобою.

Како точиши млеко, Дево Чистая; не может изрещи язык землен. странну бо естества показуеши вещь, законнаго рожества устав преходиши. темже достойно слышиши, радуися Обрадованная, Господь с Тобою.

Тайно во святых книгах речеся о Тебе, Мати Вышняю: лествицу бо древле Иаков Тя прообразующу виде, рече: степень Божия сия. Темже достойно слышиши, радуися Обрадованная, Господь с Тобою.

Слава. Чудно священноявленну Моисею, купина и огонь, показа чудо. иский же исход в прехождении времен, во Отроковице Чистой рече, зря. Ейже яко Богородице речется, радуися, обрадованная, Господь с Тобою.

И ныне. Даниил Тя нарече гору мысленную, Родительницу же Божию Исаия. видит же яко руно Гедеон. Давыд же священне глаголет, дверь же Тя ин. Гавриил же Ти вопиет: радуися, Обрадованная, Господь с Тобою.